

四庫全書

史部

欽定四庫全書

史部

欽定續通典卷四

詳校官監祭御史_臣曹錫寶

洗馬_臣王坦修覆勘

校對官編修_臣蘇青鰲

謄錄監生_臣王毓驥

欽定四庫全書

欽定續通典卷四

食貨

水利田

唐

宋

遼

金

元

明

唐代宗大歷五年朗州刺史韋夏卿治槎陂溉田千餘頃十二年昇州句容令王昕因絳巖湖周五百里為塘立二斗門以節旱暵開田萬頃十三年勅毀白渠支流碾磴以溉田德宗貞元二年明州刺史任侗修鄞縣仲

夏堰溉田數千頃又漢州刺史盧士程於雒縣立堤堰
溉田四百頃憲宗元和三年福州長樂令李葺於舊海
堤築立十斗門以禦潮旱則蓄水雨則洩水遂成良田
又江南西道觀察使韋舟築堤扞江長十二里竇以疏
漲凡為陂塘五百九十八所灌田萬二千頃穆宗長慶
初朗州刺史溫造開後鄉渠百里溉田二千頃號古史
渠後遷節度河陽復懷州古秦渠枋口樞以溉田濟源
溫河內武陟四縣田五千頃

宋太祖開寶八年知瓊州李易上言州南五里有度靈塘開修渠堰溉水田三百餘頃居民賴之太宗至道元年正月度支判官梁鼎陳堯叟上鄭白渠利害按舊史鄭渠本引涇水自仲山西抵瓠口並北山東注洛三百餘里溉田四萬頃畝收一鍾白渠亦引涇水起谷口入灤陽注渭水長二百餘里溉田四千五百頃兩渠溉田凡四萬四千五百頃今所存者不及二千頃皆近代改修渠堰浸隳舊防由是灌溉之利絕少於古鄭渠難為

興工今請遣使先詣三白渠行視復修舊迹於是詔大理寺丞皇甫選光祿寺丞何亮乘傳經度選等使還言周覽鄭渠之制用功最大並仲山而東鑿斷岡阜首尾三百餘里連亘山足堙廢已久其始涇河平淺直入渠口暨年代浸遠涇河陡深水勢漸下與渠口相懸水不能至實難致力其三白渠溉涇陽櫟陽高陵雲陽三原富平六縣田三千八百五十餘頃此渠衣食之源也望令增築堤堰以固護之舊設節水斗門一百七十有六

皆壞請悉繕完渠口舊有六石門謂之洪門今亦墮圯
若復議興置則其功甚大且欲就近度其岸勢別開渠
口以通水道歲令渠官行視岸之缺薄水之淤填即時
浚治嚴豪民盜水之禁涇河中舊有石堰廢壞已久其
後止造水堰梢樁出於緣渠之民水潦時漂流散失秋
復率民葺之數歛重困自今溉田既畢命水工拆堰木
置於岸側可充二三歲修堰之用所役緣渠之民計田
出丁凡調萬三千人疏渠造堰各獲其利固不憚其勞

也選能吏司其事置署於涇陽縣側以時行視往復甚便真宗景德三年鹽鐵副使林特度支副使馬景盛陳關中河渠之利請遣官行視鄭白渠興修古制乃詔太常博士尚賓乘傳經度率丁夫治之賓言鄭渠久廢不可復今自介公廟迴白渠洪口直東南合舊渠以畝涇河灌富平櫟陽高陵等縣經久可以不竭工既畢而水利饒足民獲數倍大中祥符七年涇原都鈐轄曹瑋言渭北有古池連帶山麓今濬為渠令民導以溉田詔嘉

獎之天禧四年淮南勸農使王貫之導海州石闔堰水
入漣水軍溉民田亦賜詔嘉獎神宗即位志在富國故
以勸農為先仁宗景祐初遣尚書職方員外郎沈厚載
出懷衛磁相邢洺鎮趙等州教民種水田神宗熙寧元
年詔諸路監司比歲所在陂塘堙沒瀕江圩埤浸壞沃
壤不得耕宜訪其可興者勸民興之具所增田畝稅賦
以聞二年權三司使吳充言前宜城令朱紘治平間修
復水渠不費公家束薪斗粟而民樂趨之渠成溉田六

千餘頃詔遷紇大理寺丞知比陽縣或云紇之木渠繞山渡溪以行水數勤民而終無功是後置三司條例司具農田利害條約詔頒諸路凡有能知土地所宜種植之法及修復陂湖河港或原無陂塘圩堰堤堰溝洫而可以創修或水利可及泉而為人所擅有或田去河港不遠為地界所隔可以均濟流通者縣有廢田曠土可糾合興修大川溝瀆淺塞荒穰合行濬導及陂塘堰埭可以取水灌溉若廢壞可興治者各述所見編為圖籍

上之有司其土田迫大川數經水害或地勢汙下雨潦
所鍾要在修築圩埧堤防之類以障水滂或疏導溝洫
畎澮以泄積水縣不能辦州為遣官事關數州具奏取
旨民修水利許貸常平錢穀給用初條例司奏遣劉彝
等八人行天下相視農田水利又下諸路轉運司各條
上利害又詔諸路各置相度農田水利官至是以條約
頒焉秘書丞侯叔獻言汴岸沃壤千里而夾河公私廢
田略計二萬餘頃多用牧馬計馬而牧不過用地之半

則是萬有餘頃常為不耕之地觀其地勢利於行水欲
於汴河兩岸置斗門泄其餘水分為支渠及京索河并
三十六陂以灌溉田詔叔獻提舉開封府界常平使行
之以著作佐郎楊汲同提舉叔獻又引汴水淤田而祥
符中牟之民大被水患都水監或以為非四年前知襄
州光祿卿史炤言開修古淳河一百六十里灌田六千
六百餘頃修治陂堰民已獲利慮州縣遽欲增稅詔三
司應興修水利墾開荒梗毋增稅五年程昉奏引漳洺

河淤地凡二千四百餘頃帝曰灌溉之利農事大本但
陝西河東民素不習此苟享其利後必樂趨三白渠為
利尤大有舊迹可用力修治凡疏積水須自下流開導
則畎澮易治書所謂濬畎澮距川是也其時人人爭言
水利提舉京西常平倉陳世修乞於唐州引淮水入東
西邵渠灌注九子等十五陂溉田二百里提舉陝西常
平沈披乞復京兆府武功縣古迹六門堰於石渠南二
百步傍為土洞以木為門回改河流溉田三百四十里

大抵迂闊少效六年程昉言得共城縣舊河漕若疏導入三渡河可灌西垆稻田從之五月詔諸創置水磴碾碓妨灌溉民田者以違制論命贊善大夫蔡曠修永興軍白渠七年程昉言滄州增修西流河堤引黃河水淤田種稻增灌塘泊并深州開引滹沱水淤田及開回胡盧河并回滹沱河下尾又金州西城縣民葛德出私財修長樂堰引水灌溉鄉戶土田授本州司士參軍又詔司農寺具所興農田水利次第八年發京東常平米募

饑民修水利又管轄京東淤田李孝寬言礬山漲水甚
濁乞開四斗門引以淤田權罷漕運再旬從之深州靜
安令任迫乞俟來年刈麥畢全放滹沱胡盧兩河又引
永靜軍雙陸口河水淤溉南北岸田二萬七千餘頃河
北安撫使沈拔請治保州東南沿邊陸地為水田皆從
之又右班殿直幹當修內司楊琰言開封陳留咸平三
縣種稻乞於陳留界舊汴河下口因新舊二堤之間修
築水塘用碎甃作虛堤五步以取汴河清水入塘灌溉

從之又江寧府上元縣主簿韓安厚引水溉田二千七百餘頃遷光祿寺丞太原府草澤史守一修晉祠水利溉田六百餘頃又知河中府陸經奏管下淤官私田約二千餘頃下司農覆實九年程師孟言河東多土山高下旁有川谷每春夏大雨衆水合流濁如黃河礮山水俗謂之天河水可以淤田絳州正平縣南董村旁有馬壁谷水嘗誘民置地開渠淤瘠田五百餘頃其餘州縣有天河水及泉源處亦開渠築堰凡九州二十六縣新

舊之田皆為沃壤前畢功續成水利圖經二卷今已十
餘年聞南董村田畝舊直三兩千收穀五七斗自灌淤
後其直三倍所收至三兩石今臣權領都水淤田竊見
累歲淤京東西鹹鹵之地盡成膏腴為利極大尚慮河
東猶有荒廢之田可引大河淤溉者於是遣都水監丞
耿琬淤河東路田十年師孟琬引河水淤京東西沿汴
田九千餘頃又前權提點開封府界劉淑奏淤田八千
七百餘頃三人皆減磨勘年以賞之元豐元年都大提

舉淤田司言京東西淤官司瘠地五千八百餘頃乞差使臣管幹許之又詔闢廢田興水利建立堤防修貼圩垸之類民力不給者許貸常平倉穀哲宗元祐中知杭州蘇軾奏杭之為州本江海故地水泉鹹苦居民零落自唐李泌始引湖水作六井然後民足於水井邑日富百萬生聚待此而食今湖狹水淺六井盡壞若二十年後盡為葑田

按臨安西湖源出於武林泉錢氏有國始置撩湖兵士專一開濬至宋稍廢不治水

涸草生漸成田

則舉城之人復飲鹹水勢必耗散又放水溉田

瀕湖千頃可無凶歲今雖不及千頃而下湖數十里間
芟菱穀米所獲不貲請募民開治禁自今不得侵佔種
植及鬻葑為界以新舊菱蕩課利錢送錢塘縣收掌謂
之開湖司公使庫以備逐年雇人開葑撩淺後湖既開
因積葑草為堤相去數里橫跨南北兩山夾道植柳林
榜曰蘇公堤行人便之因為軾立祠堤上高宗紹興元
年詔宣州太平州守臣修圩三年定州縣圩田租額充
軍儲建康府永豐圩租米歲以三萬石為額圩四至相

去皆五六十里有田九百五十餘頃五年明州守臣李
光奏明越陂湖專溉農田自慶厯中始有盜湖為田者
三司使切責漕臣嚴立法禁宣和以後廢湖為田自是
有水旱之患之行廢罷盡復為湖其江東西圩田蘇秀
圍田令監司守令條上詔逐路轉運使相度聞奏十六
年知袁州張成已言江西良田多占山岡望委守令講
陂塘灌溉之利其後比部員外郎李詠言淮西高原處
舊有陂塘請給錢米以時修濬知江陰軍蔣及祖亦言

濬治本軍五却溝以洩水修復橫河支渠以溉旱乃並
詔諸路常平司行之孝宗乾道七年修興元府山河堰
委御前諸軍統制吳玘經理發卒萬人助役盡修大堰
濬大小渠六十五凡溉南鄭褒城田二十三萬餘畝是
時詔漕臣王炎開浙西勢家新園田草蕩荷蕩菱蕩及
陂湖溪港岸際旋築塍畦圍裏耕種者所至守令同共
措置淳熙八年襄陽府守臣郭杲言本府有水渠在中
廬縣界擁馮水東流四十五里入宜城縣後溪南郡太

守王寵嘗鑿之以引蠻水謂之木里溝可溉田六千餘頃歲久堙沒乞行修治寧宗慶元二年襄陽守臣程九萬言募工修作鄧城永豐堰為農田灌溉之利是時戶部尚書袁說友等言浙西圍田相望皆千百畝陂塘淪瀆悉為田疇有水則無地可蓄有旱則無水可戽不嚴禁之後將益甚嘉泰元年以大理司直留佑賢宗正寺主簿李澄措置凡官民圍裹者盡開之又令知縣並以點檢圍田事入銜

遼太宗會同初詔以烏爾古之地水草豐美命諤爾昆錫林居之益以海勒水之善地為農田

金章宗明昌五年言事者謂郡縣有河者可開渠引以溉田詔下州郡中都路言安肅定興二縣可引河溉田四十餘畝詔命行之其時傳慎微權陝西諸路轉運使復修三白龍首等渠以溉田募民屯種盧庸為定平令治舊堰引涇水溉田民賴其利六年定制縣官任內有能興水利田及百頃以上者陞本等首注除穆昆所管

屯田能創增三十頃以上賞銀絹二十兩足其租稅止
從陸田承安二年赦放白蓮潭東陂水與百姓溉田三
年命勿毀高梁河閘從民灌溉泰和三年遣官行視中
都田禾水澤分數八年詔諸路按察司規畫水田部官
謂水田之利甚大沿河通作渠如平陽掘井種田俱可
灌溉比年邳沂近河布種豆麥無水則鑿井灌之計六
百餘頃比之陸田所收數倍以此較之他境無不可行
者遂令轉運司因出計點就令審察若諸路按察使因

勸農之便按問開河或掘井如何為便規畫具申以俟
興作宣宗貞祐三年諭尚書省歲旱議弛諸處碾磴以
其水溉民田又禁隨朝職官奪民碾磴以自營利四年
言事者程淵言碣山諸縣陂湖水至則畦為稻田水退
種麥則所收倍於陸地宜募人佃之官取三之一歲可
得十萬石詔從之興定五年南陽令李國瑞創開水田
二百餘頃詔陞職二等仍錄其最狀徧諭諸道其冬議
興水田省奏漢台信臣於南陽灌溉三萬頃魏賈達堰

汝水為新陂通運二百餘里人謂之賈侯渠鄧艾修淮陽百尺二渠通淮潁大治諸陂於潁之南穿渠三百餘里溉田二萬頃今河南郡縣多古所開水田之地收獲多於陸地數倍勅令分治戶部按行州郡有可開者誘民赴功其租止依陸田不復添徵仍以官賞給之陝西除三白渠設官外亦宜視例施行元光元年正月遣戶部郎中楊大有詣京東西南三路開水田

元太宗十二年梁泰奏請修成渠堰比之旱地其收數

倍所得糧米可以供軍遂令泰充宣差規措三白渠使郭時中副之置河渠司於雲陽縣世宗中統元年懷孟路旱總管譚澄令民鑿塘造渠引沁水以溉田教之種植地無遺利二年王允中等奉詔開沁河渠計六百七十七里經濟源河內河陽溫武陟五縣渠成甚益於民名曰廣濟溉田四百六十餘所三年左丞張守謙薦郭守敬習水利帝召見守敬陳水利言順德澧河東至古任城失其故道沒民田千三百餘頃此水開修成河其

田即可耕種又磁相東北滏漳二水合流處引水由滏陽邯鄲洺州永年鷄澤合入澧河可灌田三千餘頃又懷孟沁河雖澆灌猶有漏堰餘水東與丹河餘水相合引東流至武陟縣北合入御河可灌田二千餘頃又黃河自孟州西開引少分一渠經由新舊孟州中間順河古岸下至溫縣南復入於河其間亦有可灌田二千餘頃乃授守敬提舉諸路河渠時王允中亦請開邢洺等處漳滏澧河達泉以溉民田遂皆從之至元二年郭守

敬以河渠副使從張文謙行省西夏視古渠之在中興者一名唐來長四百里一名漢延長二百五十里他州正渠十皆長二百里支渠大小六十自兵興後皆廢壞淤淺守敬更立牕堰皆復其舊灌田九萬餘頃七年二月立司農司專管農桑水利仍分布勸農官及知水利者巡行郡邑九年詔諸路開濬水利又勅巴圖軍於哈哩納之地開渠耕田是時帝加意農田十餘年中屢興水利於是導任河復民田三千餘頃導肥河入於鄯淶

陂盡為良田又發肅州等處軍民鑿渠溉田浚奇味以
溉袞諾爾黃土山民田又開安山渠鑿通州至都河改
引渾水溉田其時能興水利之臣西夏行省郎中董文
用疏唐來漢延秦家等渠壑中興西涼甘肅瓜沙等州
之土為水田平陽路總管鄭鼎導汾水溉民田千餘頃
荆南行省廉希憲決江陵城外蓄水得良田數萬畝長
葛令趙志以地卑濕使為水田旱則決漢水灌之清苑
令耶律伯堅毀勢家水碓以溉民田事聞省部著為定

制大理等處巡行勸農使張立道以昆明池環五百餘里夏潦暴至必冒城郭役丁夫二千人治之洩其水得良田萬餘頃衛輝守王昌齡因清水出輝縣入衛河創浚溝澮溉田數百餘頃三十一年

即成宗元年

平章特爾

格奏太湖澱山湖世祖時嘗役民夫二十萬疏掘今諸河日受兩潮漸致沙漲乞即以澱山湖田糧二萬石就募民夫四千調軍夫四千依舊宋例屯守立都水防田使司修治河渠圍田從之成宗大德二年立浙西都水

庸田司專主水利置浙西平江湖渠閘堰凡七十八所
武宗至大初江浙行省言去歲水旱為災百姓艱食農
作將興各處田園高下不等陂塘圍岸高渠宜依法修
治遇旱則車水灌救遇潦則洩水通流修浚之際田主
出糧佃戶出力係官圍田無力修浚者官為借貸收成
日如數還官其拋荒積水田租額無人承佃者勸諭富
戶自備工本修築塍圍聽令佃種拋荒官田止納原租
初年免徵三年後依民田輸稅

其圍岸體式以水為平
田與水為平者第一等

園岸高七尺五寸底濶一寸面濶五尺田高一尺為第一等園岸高六尺五寸底濶九尺面濶四尺五寸田高三尺為第二等園岸高五尺五寸底濶八尺面濶四尺田高三尺為第四等園岸高四尺五寸底濶七尺面濶三尺五寸田高四尺者為第五等止添備水園岸高三尺底濶六尺面濶三尺若迫近諸湖之處自願增高者聽時哈喇哈斯行省和林浚古渠溉田數千頃三年陝

西行臺御史王承德言涇陽洪口展修石渠為萬世之利由是會集奉元路三原涇陽臨潼高陵諸縣洎涇陽渭南櫟陽諸屯官及耆老議如準所言展修石渠八十五步計四百二十五尺深二丈廣一丈五尺計用石十

二萬七千五百尺官給糧食用具丁夫就役使水之家
顧匠傭直使水戶均出陝西省議計所用錢糧不及二
年之費可謂一勞永逸委屯田府達魯噶齊珠拉濟督
工二百四十二日畢工英宗至治元年陝西屯田府言
洪口渠自秦漢至唐宋年例八月差使水戶自涇陽縣
西仲山下截河作洪堰改涇水入白渠下至涇陽縣北
白公斗分為三限北限入三原櫟陽雲陽中限入高陵
南限入涇陽澆灌官民田約七萬餘畝三年省臣奏委

官體究吳江松江還言宜開浚者常熟七處上海十四處其通海大江舊有河港聯絡官民田土藉以灌溉者亦須疏通以利耕種至泰定帝元年乃浚滌之並立牘以節水勢三年立都水庸田使司於松江掌江南河渠水利文宗大歷二年因屯田總管兼管河渠司事郭嘉議言奉元洪口渠應令涇陽近限水利戶添差修築三年懷孟路同知阿哈瑪特言天久亢旱夏麥枯槁秋穀種不入土民匱於食近因訪聞耆老咸稱舟水澆溉近

山田土居民深得其利有沁水亦可溉田中統間嘗開廣濟渠設官提調遇旱則官為斟酌驗工多寡分水灌濟源河內河陽溫武陟五縣民田三千餘頃後因豪家截河起堰立碾磨壅遏水勢又經霖雨害渠河渠司尋亦革罷今五十餘年舊蹟可考若將舊渠開濬禁安磨碾設立牖堰旱則放牌澆田澇則閉牖退水公私俱利從之順帝至正十二年立都水庸田使司於汴梁掌種植稻田事十三年右丞相托克托言京畿近水地利召

江南人耕種歲可收粟麥百萬餘石不須海運而京師
足食於是立分司農司以左丞烏克遜良棟右丞烏蘭
哈達兼大司農卿托克托領大司農事西自西山南至
保定河間北至瀋順州東至遷民鎮凡係官地及各處
屯田悉從分司農司引水立法佃種給鈔五百萬錠以
供工價牛具農器穀種之用又以武衛所管鹽臺屯田
荒閑之地及各衙門係官田地宗仁衛屯田禮部所轄
掌薪司地土並付分司農司播種又取勘徐州汝寧南

陽鄧州等處荒田并戶絕籍没入官者立司牧署掌分
司農司耕牛中書省又議於江浙淮東召募能種水田
及修築圍堰之人各一千名為農師教民播種從之是
歲大稔十五年詔凡有水田處設大司農司招集人夫
有警乘機進討無事栽植耕種凡置保定河間武清景
薊四處二十年陝西行省左丞相特哩特穆爾遣都事
楊欽修治涇渠凡溉農田四萬五千餘頃

明太祖立國之初以元帥康茂才為都水營田使諭之

曰比因喪亂隄防頽圯民廢耕耨故設營田司以修築
隄防專掌水利春作方興慮旱澇不時其分巡各處務
在蓄洩得宜毋負付任之意遂詔所在有司民以水利
條上者即陳奏洪武元年修和州銅城堰閘周迴二百
餘里四年修興安靈渠為陡渠者三十六其渠水發海
陽山秦時鑿溉田萬頃馬援葺之後圯至是始復八年
命耿炳文濬涇陽洪渠堰溉涇陽三原醴泉高陵臨潼
田二百餘里九年修彭州都江堰十七年決荊州嶽山

壩以溉民田二十四年濬定海鄞二縣東錢湖灌田數萬頃二十七年特諭工部陂塘湖堰可蓄洩以備旱澇者皆因其地勢修治之乃分遣國子生及人材徧詣天下督修水利至明年冬郡邑交奏凡開塘堰四萬九百八十七處三十一年洪渠堰圯命耿炳文修治之復濬渠十萬三千餘丈成祖永樂元年命夏原吉治蘇松嘉興水患濬華亭上海運鹽河金山衛閘及漕涇分水港原吉言浙西諸郡蘇松最居下流嘉湖常頗高環以太

湖綿亘五百里納抗湖宣歙溪澗之水散注潏山諸湖
以入三泖頃為浦港湮塞漲溢害稼拯治之法在濬吳
淞諸浦按吳淞江袤二百餘里廣一百五十餘丈西接
太湖東通海前代嘗疏之然當潮汐之衝旋疏旋塞自
吳江長橋抵下界浦百二十餘里水流雖通寔多窄淺
從浦抵上海南倉浦口百三十餘里潮汐淤塞已成平
陸灔沙遊泥難以施工嘉定劉家港即古婁江徑入海
常熟白茆港徑入海皆廣川急流宜疏吳淞南北兩岸

安亭等浦引太湖諸水入劉家白茆二港使其勢分松
近大黃浦及遇吳淞要道今下流壅塞難濬旁有范家
濱至南倉浦口徑達海宜濬深濶上接大黃浦達泖湖
之水庶幾復禹貢三江入海之舊水道既通乃相地勢
各置石閘以時啟閉每歲水涸宜修圩岸以防暴流則
水患可息帝命發民開濬原吉晝夜徒步以身先之明
年九月畢功農田大利二年復興安分水塘興安有江
源出海陽山江中橫築石埭上疊石如鱗以防衝溢自

嚴震直撤石增埭水迫無所洩衝塘岸盡趨北渠南渠
淺溢民失利至是修復如舊又諭工部安徽蘇松浙江
江西湖廣凡湖泊卑下圩岸傾頽亟督有司治之夏原
吉復奉命治水蘇松盡通舊河港又濬蘇州千墩等處
二萬九千餘丈松江大黃浦等處萬二千丈以通太湖
下流五年又築高要銀岡金山等潰堤溉田五百餘頃
九年濬灘縣干丹河定襄故渠六十三里引濬沱河水
灌田六百餘頃又麗水縣民言縣有通濟渠截松陽遂

昌諸溪水入焉上中下三源流四十八派溉田二千餘頃上源民洩水自利下源流絕沙壅渠塞請修堤堰如舊部議從之十三年吳江縣丞李昇言蘇松水患太湖為急宜洩其下流若常熟白茆諸港崑山千墩等河長洲十八都港吳縣無錫近湖河道皆宜循其故迹濬而深之仍修蔡涇等閘候潮來往以時啟閘則泛溢可免而民獲耕種之利從之十七年蕭山民言境內河渠四十五里溉田萬頃比年淤塞乞疏濬仍置閘錢清小

江灞東庶旱澇無憂山東新城民言縣東鄭黃溝源出
淄川下流壅沮淫潦妨農陳家莊南有乾河上與溝接
下通烏江乞濬治並從之二十一年修嘉定抵松江潮
圯圩岸五千餘丈又文水縣民言文谷山常稔渠分引
文谷河流袤三十餘里灌田今河潰洩水應請修葺從
之宣宗宣德二年浙江歸安知縣華嵩言涇陽洪渠堰
溉五縣田八千四百餘頃洪武時長興侯耿炳文前後
修濬未久堰壞永樂間老人徐齡言於朝遣官修築會

營造不果乞專命大臣起軍夫協修從之三年臨海民
言胡巉諸閘蓄水灌田近年閘壞而金鰲大浦湖涸舉
巉等河遂皆壅阻乞為開築帝曰水利急務使民自訴
於朝此守令不得人爾命工部即敕郡縣秋收起工仍
詔天下凡水利宜興者有司即舉行毋緩視時巡按江
西御史許勝言南昌瑞河兩岸低窪多良田洪武間修
築水不為患比年水溢岸圯二十餘處豐城安沙繩灣
圩岸三千六百餘丈永樂間水衝改修三十餘丈近者

久雨江漲堤壞乞敕有司募夫修理中書舍人陸伯倫
言常熟七浦塘東西百里灌常熟崑山田歲租二十餘
萬石乞聽民自濬之皆詔可四年潛江民言蚌湖陽湖
皆臨襄河水漲岸決害荊州三衛荊門江陵諸州縣官
民屯田無筭乞令軍民築治從之福清民言先賢里官
民田百餘頃堤障海水堤壞已久田盡荒蕪永樂中命
修治迄今未舉民不得耕帝責有司亟治而諭尚書吳
中嚴飭郡邑陂池堤堰及時修濬慢者治以罪六年巡

撫侍郎周忱言潁水永豐圩周圍八十餘里環以丹陽石臼諸湖舊築埂壩通陟門石塔農甚利之今頽敗請葺治教諭唐敏言常熟耿涇塘南接梅里通昆承湖北達大江洪武中濬以溉田今壅阻請疏導並從之七年修眉州新津通濟堰堰水出彭山分十六渠溉田二萬五千餘畝英宗正統三年疏泰興順德鄉三渠引湖溉田寧夏巡撫都御史金濂言鎮有五渠資以行溉今明沙州七星漢伯石灰三渠久塞請用夫四萬疏濬溉蕪

田千三百餘頃從之五年令天下有司秋成時修築圩岸疏浚陂塘以便農作仍具數繳報俟考滿以憑黜陟九年浚無錫谷里諸河東南接蘇州苑山湖塘北通揚子江西接新興河引水灌田又開海陽縣隆津等溝引長溪水溉田十三年以雲南鄧川州民田與大理屯田接壤湖畔積水壅沙禾苗揜沒命州衛軍民疏治十四年浚和州姥鎮河張家溝并建閘以溉降福等七十餘圩及南京諸衛屯田時范衷知壽昌縣闢荒田二千六

百餘畝興水利三百四十六區景帝景泰四年雲南總
兵官沐璘言城東有水南流源發邵甸會九十九泉為
一抵松花壩分為二支一繞金馬山麓入滇池一從黑
窯村流至雲澤橋亦入滇池舊於下流築堰溉軍民田
數十萬頃霖潦無所洩請令受利之家自造石閘啟閉
以時報可五年疏靈寶黎園莊渠通鴻瀘澗溉田萬頃
七年尚書孫原貞言杭州西湖為勢豪侵佔湖水淺狹
開石毀壞今民田無灌溉資乞敕有司興濬築禁侵占

以便軍民從之英宗天順二年修彭縣萬工堰灌田千
餘頃五年僉事李觀言涇水出涇陽仲山谷道高陵至
櫟陽入渭袤二百餘里漢開渠溉田宋元俱設官主之
今雖有瓠口鄭白二渠而堤堰摧決溝洫壅滯民弗蒙
利乃命有司濬之都御史項忠又言瓠口鄭白二渠宣
德間遣官修鑿畝收三四石無何復塞渠旁之田遇旱
為赤地昨請於涇水上源龍潭左側疏濬訖舊渠口尋
以詔例停止今宜畢其役邳州知州孟琳言榆行諸社

并臨沂河久兩岸崩二十八處低田盡渰乞興修築並從之憲宗成化十年廷臣會議江浦北城圩古溝北通滁河浦子口城東黑水泉古溝南入大江二溝相望岡壠中截宜鑿通成河旱引澇洩從之十二年巡按御史許進言河西十五衛東起莊浪西抵肅州綿亘幾二千里所資水利多奪於勢豪宜設官專理詔屯田僉事兼之十八年濬雲南東西二溝自松華壩黑龍潭抵西南柳壩南村灌田數萬頃二十年修嘉興等六府海田堤

岸特遣京堂官往督之時張瑄為廣東布政使修陂塘
圩岸四千六百雍泰知吳縣太湖漲沒田千頃作堤為
民利稱雍公堤孝宗弘治七年濬南京天潮二河備軍
衛屯田水利特命侍郎徐貫與都御史何鑑經理浙西
水利巡撫都御史王珣請於靈州金積河口開渠灌田
給軍民佃種從之武宗正德十五年御史成英言應天
等衛屯田在江北滁和六合者地勢低屢為水敗從金
城港抵濁河達烏江三十餘里因舊迹濬之則水勢洶

而屯田利詔可世宗嘉靖二十四年呂光洵按吳奏蘇
松水利五事一曰廣疏濬以備潴洩開吳淞江等處洩
澱山之水以達於海濬白茆等處之水以注於江導田
間之水悉入小浦使流者皆有所歸潴者皆有所洩則
下流之地治而澇無所憂矣乃濬艾祁通波以溉青浦
濬顧浦吳塘以溉嘉定濬大瓦等浦以溉崑山之東濬
許浦等塘以溉常熟之北濬臧村等港以溉金壇濬澡
港等河以溉武進凡隴岡支河堙塞不治者皆濬之深

廣使復其舊則上流之地亦治而旱無所憂矣一曰修
圩岸以固橫流向來民間足食有餘力治圩岸田益完
美近皆空乏無暇修繕故田圩漸壞歲多水災合敕所
在官司常治圩岸岸高則田自固雖有霖潦不能為害
一曰復板閘以防淤塞一曰量緩急以處工費一曰重
委任以責成功詔悉如所議二十六年給事中陳斐請
仿江田水田法開江北溝洫以祛水患益歲收報可三
十八年總督尚書楊博請開宣大荒田水利從之是時

有司能以水利益民者廉州府知府張岳督民墾棄地
教以桔槔運水紹興知府湯紹恩因山陰會稽蕭山三
邑之水匯三江口入海潮汐日至良田盡為巨浸乃遂
建閘三十有八築石堤四百餘丈刻水則石間以時啟
閉自是數百里無水患徐九思治張秋河道漕河與鹽
河近而不相接漕水溢則泛濫為田患九思議築減水
橋於沙灣俾二水相通漕水溢則有所洩而不侵田少
則有所限而不至於涸工成遂為永利龐嵩為應天治

中江寧縣葛仙永豐二鄉頻遭水患居民止存七戶蒿
為治隄築防得田三千六百畝立惠民莊四召貧民佃
之瞿晟知廣平府鑿長渠三百里引水為四閘得田數
十萬畝神宗萬厯十三年以尚寶司少卿徐貞明兼御
史領墾田使貞明為給事中嘗請興西北水利如南人
圩田之制引水成田工部覆議畿輔諸郡邑以上流十
五河之水洩於猫兒一灣海口又極束隘故所在橫流
必多開支河挑濬海口而後水勢可平疏濬可施然後

大費繁而今以民勞財匱方務省事請罷其議乃已後
貞明謫官著潞水客譚一書論水利當興者十四條時
巡撫張國彥副使顧養謙方開水利於薊永有效於是
給事中王敬民薦貞明特召還賜敕勘水利貞明乃先
治京東州邑如密雲燕樂莊平峪水峪寺龍家務莊三
河塘會莊順慶屯地薊州城北黃崖營城西白馬泉鎮
國莊城東馬伸橋夾林河而下別山舖夾陰流河而下
至於陰流遵化平安城夾運河而下沙河舖西城南鐵

廠湧珠湖以下韭菜溝上素河下素河百餘里豐潤之
南則大寨刺榆圪史家河大王莊東則榛子鎮西則鴉
紅橋夾河五十餘里玉田青莊塢後湖莊三里屯及大
泉小泉至於瀕海之地自水道沽關黑巖子墩至開平
衛南宋家營東西百餘里南北百八十里墾田三萬九
千餘畝至真定將治滹沱近堽地御史王之棟言滹沱
非人力可治徒耗財擾民帝是其言將罪諸建議者申
時行言墾田興利謂之害民議甚舛顧為此說者其故

有二北方民游惰好閒憚於力作水田有耕耨之勞胼
胝之苦不便一也貴勢有力家侵占甚多不待耕作坐
收蘆葦薪芻之利若開墾成田歸於業戶隸於有司則
已利盡失不便二也然以國家大計較之不便者小而
便者大惟在斟酌地勢體察人情沙鹵不必盡開黍麥
無煩改作應用夫役必官募之不拂人情不失地利乃
謀國長策耳於是貞明得無罪而水田終罷三十年保
定都御史汪應蛟言易水可溉金臺滹水可溉恒山塘

水可溉中山滏水可溉襄國漳水可溉鄴下而瀛海當
衆河下流故號河中視江南澤國不異至於山下之泉
地中之水所在皆有宜各設壩建閘通渠築堤高者自
灌下用車汲用南方水田法六郡之內得水田數萬頃
畿民從此饒永無旱澇之患不幸濱河有梗亦可改折
於南取糴於北此國家無窮利也報可應蛟乃於天津
葛沽何家園雙溝白塘令防海軍丁屯種人授田四畝
共種五千餘畝水稻二千畝收多因上言墾地七千頃

歲可得穀二百餘萬石是時有司能興水利者陳邦瞻
為河南布政使開水田千頃陳幼學為中牟令縣有大
澤積水占膏腴田二十餘里幼學疏為河者五十七為
渠者百三十九俱引入小清河民獲大利大莊諸里多
水為築堤十三道障之真定知府郭勉濬大鳴小鳴泉
四十餘穴溉田千頃邢臺達活野狐二泉流為牛尾河
百泉流為澧河建二十一閘二堤灌田五百餘頃熹宗
天啟元年御史左光斗用應蛟策復天津屯田令通判

盧觀象管理屯田水利明年巡按御史張慎言自枝河而西靜海興濟之間萬頃沃壤河之東尚有鹽水沽等處為膏腴之田惜皆蕪廢今觀象開寇家口以南田三千餘畝溝洫蘆塘之法種植疏濬之方皆具而有法人何憚而不為大抵開種之法有五一官種謂牛種器具耕作雇募皆出於官而官亦盡收其田之入也一佃種謂民願墾而無力其牛種器具仰給於官待納稼之時官十而取其四也一民種佃之有力者自認開墾若干

迨開荒既熟較數歲之中以為常十一而取是也一軍種即令海防營軍種葛沽之田人耕四畝收二石緣有行月糧故收租重也一屯種祖宗衛軍有屯田或五十畝或百畝軍為屯種者歲入十七於官即以所入為官軍歲支之用國法兵農之善制也四法已行惟屯種則今日兵與軍分而屯僅存其名當選各衛之屯餘壑津門之沃土如官種行之章下所司命太僕卿董應舉管天津至山海屯田規畫數年開田十八萬畝積穀無算

莊烈帝崇禎二年兵部侍郎申用懋言永平灤河諸水
逶迤寬衍可疏渠以防旱潦山坡隙地便栽種宜令有
司相地察源為民興利從之



欽定續通典卷四

欽定四庫全書

史部

欽定續通典卷
六五

詳校官監察御史臣曹錫寶

洗馬臣王坦修覆勘

校對官編修臣蘇青鰲

謄錄舉人臣王駿姿

欽定四庫全書

欽定續通典卷五

食貨

屯田 唐 五代 宋 遼 金

唐德宗建中初宰相楊炎請置屯田於豐州發關輔民鑿陵陽渠以增溉京兆尹嚴郢嘗從事朔方知其利害以為不便疏奏不報郢又奏五城舊屯其數至廣以開渠之糧貸諸城約以冬輸又以開渠功直布帛先給田

者據估轉穀如此則闢輔免調發五城田闢比之浚渠利十倍也時楊炎方用事郢議不用憲宗元和中振武軍饑宰相李絳請開營田可省度支漕運及絕和糴欺隱憲宗稱善乃以韓重華為振武京西營田和糴水運使起代北墾田三百頃出贓罪吏九百餘人以耒耜耕牛假種糧使償所負粟二歲大熟因募人為十五屯每屯百三十人耕百頃就高為堡東起振武西逾雲州極於中受降城凡六百餘里列柵二十墾田三千八百餘

里歲收粟三十萬石省度支錢二千餘萬緡重華入朝
奏請益開田五千頃法人七千可以盡給五城會李
絳已罷後宰相持其議而止至憲宗末天下營田皆雇
民或借庸以耕又以瘠地易上地民間苦之穆宗即位
詔還所易地而耕以官兵耕官田者給三之一以終身
靈武邠寧土廣肥而民不知耕文宗太和末王起奏立
營田後党項大擾河西邠寧節度使畢誠亦募士開營
田歲收三十萬斛省度支錢數百萬緡貞觀開元後邊

土西舉高昌龜茲焉耆小勃律北抵薛延陀故地緣邊
數十州戍重兵營田及地租不足以供軍於是始有和
糴

周太祖廣順三年敕悉罷戶部營田務以其民隸州縣
其田廬牛農器並賜見佃者為永業自唐末中原宿兵
所在皆置營田以耕曠土其後又募高貲戶使輸課佃
之戶部別置官司總領不隸州縣或丁多無役或容庇
奸盜州縣不能詰梁太祖擊淮南掠得牛以千萬計給

東南諸州農民使歲輸租自是歷數十年牛死而租不除民甚苦之帝素知其弊會閤門使知青州張凝請罷營田務李穀亦以為言遂敕罷之

宋太宗端拱二年六宅使何承矩請於順安砦西引易河築堤為屯田及承矩知雄州又言宜因積潦蓄為陂塘大作稻田以足食會滄州臨津令閩人黃懋上書言閩地唯種水田緣山導泉倍費功力今河北州軍多陂塘引水溉田省功易效三五年間公私必大獲其利詔

承矩按視還奏如懋言遂以承矩為制置河北沿邊屯田使懋為大理寺丞充判官發諸州鎮兵一萬八千人給其役凡雄莫霸州平戎順安等軍興堰六百里置斗門引淀水灌溉初年種稻值霜不成懋以晚稻九月熟北霜早而地氣遲江東早稻七月即熟取其種課令種之是歲八月稻熟初承矩建議沮之者頗衆武臣習攻戰亦恥於營葺既種稻不成羣議愈甚事幾為罷至是承矩載稻穗數車遣吏送闕下議者乃息又度支判官

陳堯叟等言漢魏晉唐於陳許鄧潁暨蔡宿亳至於壽春用水利墾田陳迹具在請選官大開屯田以通水利發江淮下軍散卒及募民充役給官錢市牛置耕具導溝瀆築防堰每屯十人給一牛治田五十畝雖古制一夫百畝今且墾其半俟久而古制可復也畝約收三斛歲可收十五萬斛七州之間置二十屯可得三百萬斛因而益之數年可使倉廩充實省江淮漕運帝覽奏嘉之遣大理寺丞皇甫選光祿丞何亮乘傳按視經度真

宗咸平中大理丞王宗旦請募民耕潁州陂塘荒地凡千五百頃部民應募者三百餘戶詔令未出租稅免其徭役然無助於功利而汝州舊有路南務內園兵人種稻至是命京朝官專招募民二百餘自備耕牛立團長墾地六百頃導汝水灌溉歲收二萬三千石又知襄州耿望請於舊地括荒田置營田上中下三務調夫五百築堤堰仍集鄰州兵每務一百人荆湖市牛七百分給之是歲種稻三百餘頃四年陝西轉運使劉綜亦言宜

於古原州建鎮戎軍置屯田今本軍一歲支給芻糧四十餘萬石束約費茶鹽五十餘萬倘更令遠民輸送其費益多請於軍城四面立屯田務開田五百頃置下軍二千人牛八百頭耕種又於軍城前後及北至水峽口各置堡砦分居其人無寇則耕寇來則戰就命知軍為屯田制置使自擇使臣充四砦監押每砦五百人充屯戍從之既而原渭州亦開方田戎人內屬者皆依之得安其居是時兵費浸廣言屯營田者輒詔邊臣經度行

之順安軍兵馬都監馬濟請於靖戎軍東壅鮑河開渠
入順安威虜二軍置水陸營田於其側命莫州部署石
普護其役知保州趙彬奏決雞距泉自州西至蒲城縣
分徐河水南流注運渠廣置水陸屯田詔駐治都監王
昭遜共成之自是定州亦置屯田五年罷襄州營田下
務六年耿望又請於唐州赭陽陂置務如襄州歲種七
十餘頃方城縣令佐掌之調夫耘耨景德二年令緣邊
有屯營田州軍長吏並兼制置諸營田屯田事舊兼使

者如故大中祥符九年改定保州順安軍營田務為屯
田務凡九州軍皆遣官監務置吏屬淮南兩浙舊皆有
屯田後多賦民而收其租第存其名在河北者雖有其
實而歲入無幾利在蓄水以限戎馬而已天禧末諸州
屯田總四千二百餘頃河北歲收二萬九千四百餘石
而保州最多逾其半焉繼右正言田况言鎮戎原渭地
方數百里舊皆民田今無復農事可即其地大興營田
以其兵之不習戰者分耕五百人為一堡三兩堡置一

營田官領之播種以時農隙則習武事疏奏不用後乃命三司戶部副使夏安期等議並置邊屯田迄不能成神宗熙寧三年著作佐郎王韶言渭原城而下至秦州成紀旁河五六百里良田不耕者無慮萬頃治千頃可得三十萬斛因知秦州李師中等奏韶妄指實無其地降韶官其後韓鎮知秦州乃言實有古渭砦地空地四千餘頃遂復韶故官從其所請行之明年河北屯田司奏豐歲屯田入不償費於是詔罷緣邊水陸屯田務募

民租佃收其兵為州廂軍時陝西多曠土未耕屯戍不可撤遠方有輸送之勤知延州趙高請募民耕以紓朝廷憂詔下其事經略安撫使郭達言懷寧砦所得地百畧以務弓箭手無閒田高又言之遂括地得萬五千餘畧募漢蕃兵幾五千人為八指揮詔遷高官賜金帛而熙州王韶又請以河州蕃部近城川地招弓箭手以山坡地招蕃兵弓箭手每砦五指揮以二百五十人為額人給地一畧蕃官二畧大蕃官三畧七年以熙河多良

田詔委提點秦鳳路刑獄鄭民憲興營田許奏辟官屬以集事樞密使吳充上疏曰今之屯田誠未易行古者一夫百畝又受田十畝為公田莫若因弓箭手倣古助田法行之熙河四州田無慮萬五千頃十分取一以為公田大約中歲畝一石則公田所得十五萬石官無屯營牛具廩給之費借用衆力而民不勞大荒不收而官無所損省轉輸平糴價如是者其便有六而提點刑獄鄭民憲言祖宗時屯營田皆置務屯田以兵營田以民

固有異制然襄州營田既調夫矣又取鄰州之兵是營田不獨以民也邊州營田不限兵民皆取給用是屯田不獨以兵也至於招弓箭手不盡之地復以募民則兵民參錯固無異也而前後施行或侵占民田或差借耨夫或諸郡括牛或兵民雜耕或諸州廂軍不習耕種不能習水土頗致煩擾至於歲之所入不償其費遂又報罷惟因弓箭手為助田法一夫受田百畝別以十畝為公田俾之自備種糧功力歲畝收一石水旱三分除一

官無廩給之費民有耕鑿之利若可以為便然弓箭手招至者未安其業而種糧無所仰給又責其借力於公田慮人心易搖乞候稍稔推行九年詔熙河弓箭手耕種不及之田經略安撫司點廂軍耕之官置牛具農器人一頃歲終叅較弓箭手廂軍所種優劣為賞罰弓箭手逃地并營田召佃租課許就近於本城若輸納仍免折變支移元豐二年改定州屯田司為水利司及章惇築元州亦為屯田務其後遂罷之募民租佃役兵各還

所隸五年詔提舉熙河等路弓箭手營田蕃部共為一
司隸涇原制置司提舉熙河營田康識言新復土地乞
命官分畫疆界選知田廂軍人給一頃耕之餘悉給弓
箭手人加一頃有馬者又加五十畝每五十畝為一營
四保若見缺農作廂軍許於秦鳳涇原熙河三路選募
廂軍及馬遞鋪卒願行者人給裝錢二千詔皆從之知
太原府呂惠卿嘗上營田疏曰今葭蘆米脂裏外良田
不啻一二萬頃夏人名為真珠山七寶山言其多出禾

粟也若耕其半則兩路新砦其費已不盡資內地況能盡闢之乎前此所不敢進耕者外無捍衛也今於葭蘆米脂相去一百二十里間各建一砦又其間置小堡鋪相望則延州之義合白草與石州之吳堡尅明以南諸城若干里邊面皆為內地而河外之州荒閒之地皆可墾闢以贍軍用凡昔為夏人所侵及蘇安靖棄之以為兩不耕者皆可為法耕之於是就糴河外而使河內之民被支移者量出脚乘之直革百年遠輸貴糴以免困

公之弊財力稍豐又通葭蘆之道於靈州之神木其通堡砦亦如葭蘆米脂之法而橫山膏腴之地皆為吾有矣七年惠卿雇五縣耕牛發將兵外護而耕新疆葭蘆吳堡間膏腴地號木瓜原者凡得地五百餘頃麟府豐州地七百三十頃弓箭手與民之無力及異時兩不耕者又九百六十頃惠卿自謂所得極厚可助邊計乞推之陝西八年樞密院奏去年耕種木瓜原凡用將兵人馬之費所收禾粟蕎麥不償所費因詔止惠卿其河東

進築堡砦自麟石廊延南北近三百里及涇原環慶熙
河蘭會新復城砦地土悉募廂軍配卒耕種免役已而
營田司使言諸路募發廂軍皆不嫻耕作遂各遣還其
州高宗紹興元年知荆南府解潛奏辟宗綱樊賓措置
屯田詔除宗綱充荆南府歸峽州荆門公安軍鎮撫使
司措置五州營田官樊賓副之渡江後營田蓋始於此
其後荊州軍食仰給省縣官之半焉三年懷安府復州
漢陽軍鎮撫使陳規倣古屯田凡軍士相險隘立堡砦

且守且耕必給費斂復給糧依助田法餘並入官凡
民水田畝賦稅米一斗陸田豆麥夏秋各五升滿二年
無欠給為永業兵民各處一方流民歸業寢衆亦置堡
砦屯聚之凡屯田事營田司兼之營田事府縣兼之廷
臣因規奏推廣謂一夫受田百畝古制也今荒田甚多
當聽百姓請射其有關耕牛者宜用人耕之法以二人
曳一犁凡受田五人為甲別給蔬地五畝為廬舍場圃
兵屯以大使臣主之民屯以縣令主以歲課多少為殿

最下諸鎮推行之詔江東西宣撫使韓世忠措置建康營田如陝西弓箭手法世忠言沿江荒田大半有主難如陝西例乞募民承佃都督府奏如世忠議仍蠲三年租滿五年田主無自陳者給佃者為永業詔湖北浙西江西皆如之其徭役科配並免五年詔淮南川陝荆襄屯田六年都督張俊奏改江淮屯田為營田凡官田逃田並拘籍以五頃為一莊募民承佃其法五家為保共佃一莊以一人為長每莊給牛五具耒耜及種副之別

給十畝為蔬圃貸錢七十千分五年償命樊賓王弗行之尋命五大將劉光世韓世忠張俊岳飛吳玠及江淮荆襄利路師悉領營田使遷賓司農少卿提舉江淮營田置司建康弗屯田員外郎副之官給牛種撫存流移一歲中收穀三十萬石有奇殿中侍御史石公揆監中嶽李霖及王弗皆言營田之害張俊亦覺其擾請罷司以監司領之於是詔帥臣兼領營田九月以川陝宣撫吳玠治廢堰營田六十莊計田八百五十四頃歲收一

十五萬石以助軍儲賜詔獎諭二十二年督視湖北京西軍馬汪澈言荆湖兩年屯守襄漢糧餉浩瀚襄陽古有二渠長渠溉田七千頃水渠溉田三千頃兵後堙廢今先築堰開渠募邊民或兵之老弱耕之其耕牛耒耜種糧令湖北京西轉運使措置既省餽運又可安集流亡從之孝宗隆興元年臣僚言州縣營田之費其說有十曰擇官必審募人必廣穿渠必深鄉亭必修器用必備田處必利食用必充耕具必足定稅必輕賞罰必行

且欲立賞格以募人及住廣西馬綱三年以市牛曾有
訴襄陽屯田之擾者上欲罷之工部尚書張闡言今日
荆襄屯田之害以其無耕田之民而課之游民游民不
足而強之百姓於是百姓舍已熟田而耕官生田或遠
百里徵呼以來或名雙丁而役其強壯老稚無食一方
騷然罷之誠是也然自去歲以來置耕牛農器修長水
二渠費已十餘萬一旦舉而棄之則荆襄之地終不可
耕也比見兩淮歸正之民動以萬計官不能給食則老

弱饑死強者轉而之他若使就耕荆襄之田非唯可免
流離抑使中原之民聞之知朝廷有以處我率皆襁負
而至矣異時墾闢既廣取其餘以輸官實為兩便詔除
見耕者依舊餘令虞仲文同王珏措置二年江淮都督
府叅贊陳俊卿言欲以不披帶人擇官荒田標旗立砦
多買牛犁縱種其中官不收租人自樂從數年之後墾
田多則穀必賤所在有屯則村落無盜賊之憂軍食既
足則饋餉無轉運之勞此誠經久守淮之策詔從之乾

道五年四川宣撫使鄭剛中撥軍耕種以歲收租米對減成都路對糴米一十二萬石贍軍然兵民雜處村疇為擾百端又數百里差民保甲教耕有二三年不代者民甚苦之知興元府晁公武欲以三年所收最高一年為額等第均數召佃放兵及保甲以護邊從之八月詔鎮江都統司及武鋒軍三處屯田兵並拘收入隊教閱六年罷和揚州屯田八年復罷廬州兵屯田淳熙十年鄂州江陵府駐劄副都統制郭杲言棗易屯田興置二

十餘年未能大有益於邊計非田有不良蓋人力有所未至今邊陲無事正宜修舉為實邊之計本司有荒熟地七百五十頃乞降錢三萬緡收買耕牛農具便可施功如將來更有餘力可括荒田接續開墾從之光宗紹熙元年知和州劉煒以剩田募民充萬弩手分耕寧宗嘉定三年國子監司業劉燾接伴金使於盱眙軍還言兩淮之利藩蔽江南干戈盜賊之後宜加經理必於招集流散之中就為足食足兵之計淮東地平博膏腴有

陂澤水泉之利而荒蕪實多其民勁悍勇敢習邊鄙戰鬪之事而安集者誠能經畫郊野招集散亡約頃畝以授田使無廣占拋荒之患列溝洫以儲水且備戎馬馳突之虞為之具田器貸種糧相其險易聚為室廬使相保護聯以什伍教以擊刺使相糾率或鄉為一團里為一隊平居則耕有警則守有餘力則戰帝嘉納之七年以京西屯田募人耕種十三年四川宣撫使安丙總領任處厚言紹興十五年諸州共墾田二千六百五十餘

頃夏秋輸租米一十四萬一千餘石餉所屯將兵罷民和糴為利可謂博矣乾道四年以從屯兵歸軍教閱而營田付諸州募佃遂致租利陷失驕將豪民乘時占據其弊不可概舉今豪強移徙田土荒閒正當拘種之秋合自總領所與宣撫使措置其逃絕之田關內外亦多有之為數不貲其利不在營田之下乞併括之十五年詔江淮荆襄四川制置監司條畫營田來上十七年復命淮東西湖北路轉運司提督營屯田理宗端平元年

命王旻守隨州王安國守棗陽蔣成守光化楊恢守均並益兵飭備經理唐鄧屯田又以臣僚言屯五萬人於淮之北且田且守置屯田判官一員經紀其事暇則教以騎射初弛田租三年又三年則取其半知大寧監邵潛言昔鄭剛中營於蜀之關隘雜兵民屯田歲收粟二十餘萬石是後屯田之利既廢糧運之費益增宜詔帥臣縱兵民耕之所收之粟計直以償之則總所無轉輸之苦邊關有儲峙之豐戰有餘勇守有餘備矣從之嘉

熙四年孟珙為宣撫四川兼屯田大使軍無宿儲遂大興屯田調夫築堰募農給種首種歸尾漢口為屯二十為莊百七十為頃十八萬八千二百八十上屯田始末與所減券食之數降詔獎諭又令流民於邊江七十里內分田以耕遇警則用以守江於邊城三五十里內亦分田以耕遇警則用以守城在砦者則耕四野之田而用以守砦田在官者免其租在民者則以所收十之三歸其主俟三年事定則各還原業淳祐十二年詔襄樊

已復措置屯田修渠堰寶祐三年詔撥封椿庫十八界
會十萬銀二千兩付李夢康措置襄陽屯田又詔沿邊
耕屯課入登羨管屯田官推賞荆襄兩淮及山砦如之
度宗咸淳元年詔曰淮蜀荆襄之民所種屯田既困重
額又困苛取流離之餘口體不充及遇水旱收租不及
而催輸急於星火民何以堪其日前舊欠並除之復催
者以違制論

遼太宗會同五年詔以契丹分屯南邊聖宗統和十二

年賜南京統軍司貧戶耕牛耶律昭言西北諸郡每當農時一夫偵候一夫治公田二夫給糶官之役大率四丁無一室處窮牧之事仰給妻孥一遭寇掠貧窮之室春夏賑恤吏多雜以糠粃重以培克不過數月又復告困且畜牧者富國之本有司防其隱沒聚之一所不得各就水草便地魚以逋亡戍卒隨時補調不習風土故日積月損馴至耗竭為今之計莫若賑窮薄賦給以牛種使遂耕穫置游兵以防盜掠頒俘獲以助伏臘散畜

牧以就善地期以數年富强可望時皆以為切論太平
七年詔諸屯田在官斛粟不得擅貸在屯者力耕公田
不輸賦稅興宗重熙十三年詔選南北府兵富者援山
西路餘屯田於天德軍道宗大安初年西蕃多叛上欲
為守禦計命耶律唐古督耕稼以給西軍唐古率衆田
臚胸河側歲登上熟移屯鎮州凡十四稔積粟數十萬
斛每斗不過數錢

金太祖收國元年敗遼軍於阿婁岡獲其耕具數千給

賜諸軍天輔五年二月分諸路明安穆昆之民萬戶屯
泰州賜耕牛五十其時代遼取泰州徙遼降人居之命
千戶穆昆宗雄按視泰州地戶宗雄包其土來奏曰其
土如此可種植也由是徙萬家屯田泰州以博勒和為
都統太宗天會九年詔新徙戍邊戶乏耕牛者給以官
牛別委官勸督田作其續遷戍戶在中路者姑止之即
其地種藝俟畢穫而行及來春農時至戍所熙宗天眷
初年以既取江南慮中原士民懷貳始創屯田軍凡女

真奚契丹之人皆自本部徙居中州與百姓雜處計其戶口授以官田使自播種春夏量給其衣遇出師始給錢米凡屯田之所自燕南至淮隴之北俱有之皆築壘於村落間世宗大定三年以正隆兵興農桑失業明安穆昆屯田多不如法遣戶部侍郎魏子平等分道勸農二十一年以山東路所括民田分給女真屯田人戶又時以黃河移故道梁山灤水退地甚廣遣使安置屯田民時帝意不欲明安穆昆人戶與民戶雜居凡山東兩

路屯田與民田互相犬牙者皆以官田對易御史中丞
張九思言屯田明安人戶為盜徵償家貧輒賣屯地凡
家貧不能徵償者止令事主以其地招佃收其租入估
價與徵償相當即以其地還之臨洮尹完顏讓亦論屯
田貧人徵償賣田乞用九思議詔可二十二年以山東
屯田戶鄰于邊鄙命聚之一處俾協力耕種章宗明昌
元年勅當軍人所授田止令自種力不足者方許承佃
亦止隨所產納租其有自願折錢輸納者從民所願不

願承佃者毋強又勅隨處係官閑地百姓已請佃者仍舊未佃者付明安穆昆屯田永安二年差戶部郎中李敬義往臨潢等路規畫農事舊令軍人所授之地不得租賃於人違者苗付地主五年中都山東河北屯駐軍人地土不贍官田多為民所冒佔主兵者言比歲征伐軍多敗衄盡由屯田地寡不免饑寒故無關志願括民田之冒稅者分給之則士氣自信朝議已定平章政事張萬公獨上書言其不可者五大略以為軍旅之後瘡

疲未復百姓拊摩之不暇何可重擾一也通檢未久田
有定籍括之必不能盡適足增猾吏之弊長告訐之風
二也浮費侈用不可勝計推之以養軍可斂不及民而
無待於奪民之田三也兵士失於選擇強弱不別而使
同田共食振勵者無以盡其力疲劣者得以容其奸四
也奪民而與軍得軍心而失天下心其禍有不可勝言
者五也必不得已乞以冒地之已括者召民蒔之以所
入贍軍則軍有坐獲之利而民無被奪之患矣書奏不

報命樞密使宗浩禮部尚書賈鉉佩金符行省山東等
路括地給軍凡得地三十餘萬給軍順天軍節度使張
行簡上言比者括官田給軍既一定矣有告欲別給者
輒從其告至今未已名曰官田實取之民以與之臣所
管已撥深澤縣地三百餘頃復告水占沙陂者三之一
若悉從之何地可定臣謂當限以月日不許再告為便
下尚書省議奏請如實有水占河塌不可耕種按視覆
同然後改撥若沙陂瘠薄當準已撥為定制曰可泰和

四年定制所撥地止十里內者自種之每丁四十畝續進丁同此餘者許令便宜租賃及兩和分種違者錢業還主五年二月帝又聞六路括地時其間屯田軍戶多冒民增口以請官地及包取民田而民有空輸稅賦虛抱物力者應詔陳言人多論之遣官分清追照業憑尚書省奏遣官徒滋訟言乃令虛抱稅石已輸送入官者於稅內續扣之宣宗貞祐三年以時方南遷徙河北軍戶於河南議所以處之者宰臣言當指官田及牧地分

界之已為民田者則俟秋獲後仍日給米一升折以分鈔大常丞舒穆魯世勳曰荒田收地耕闢費力奪民素墾則民失所帝欲從宰臣議侍御史劉元規復上言帝乃罷之後因北方侵及河南盡起諸路軍戶南來共圖保守復議得軍糧之術或益賦或與軍田二者孰便叅政高汝礪言河南官民地相半又多全佃官地之家一旦奪之何以自活小民易動難安一時避賦遂有捨田之言及與人又復悔悔則忿心生矣如山東撥地時腴

地盡入富家瘠者乃付貧戶無益於軍而民有損惟當
倍益官租以給軍食復以係官荒田牧地量數與之令
其自耕則民不失業官不厲民矣從之又言河北軍戶
徙居河南者幾萬口

疑當作百萬口
或係史之誤

人日給粟一升歲

費三百六十萬石半以給直猶支三百萬

疑當作
二百萬

河南

租地計二十四萬頃歲租計一百五十六萬乞於經費
之外倍徵以給之帝命右司諫馮開等五人分行諸郡
就授以荒官田及牧地可耕者人三十畝至十一月又

以括荒田及牧馬地給軍事命汝礪總之汝礪還奏今頃畝之數較之舊籍甚少復多瘠惡不可耕又僻遠之處必徙居以就之彼皆不能自耕必以與人又當取租於數百里之外況今農田且不能盡闢豈有餘力以耕叢薄交固草根糾結之荒地哉詢諸軍戶皆欲得半糧猶足自養得田不能耕復罷其廩將何所賴臣知初籍地之時未嘗按閱其實所以不如其數不得其處也若復考計州縣必各妄承風旨追呼究訐以應命不足其

數則妄指民田以充之所在又騷然矣今民之賦役三倍平時飛輓轉輸日不暇給而復為此舉將何堪之且軍戶覓遷行有還期何為以此病民病民而軍獲利猶不可為况無所利乎遂詔罷給田但半給糧半給實直焉四年復遣官括河南牧馬地既籍其數帝命省院議所以給軍者宰臣言今軍戶當給糧者四十四萬八千餘口計當口占六畝有奇繼來者不與焉相去數百里者豈能以六畝之故遠來兼月支口糧不可遽罷臣等

竊謂軍戶願佃者即當計口給之其餘僻遠不願者宜
準近制係官荒地許軍民耕闢例令軍民得占蒔之院
官言牧馬地少且久荒難耕軍戶復乏農器不給之則
彼自支糧外更無從得食非蓄銳待敵之計給之則未
能遽減其糧若得進以歲月俟頗成倫次亦漸可以省
官廩今奪於有力者即以授之其無力者恐無以耕乞
令司縣官勸率民者借牛破荒至來春然後給之司縣
官能率民戶以助耕而無騷動者量加官賞庶幾有所

激勸宰臣又言若如所言則司縣官貪慕官賞必將抑配以擾民况民家之牛量地而畜之比年以來農功甫畢併力轉輸猶恐不及豈有暇耕他人之田唯如前奏為便詔再議之乃議民有能開牧馬地及官荒地作熟田者以半給之為永業半給軍戶奏可省臣又奏自古用兵且耕且戰是以兵食交足今諸帥分兵不啻百萬一充軍伍咸仰於官至於婦子居家安坐待哺蓋不能屯田為經久之計也願下明詔令諸帥府各以其軍耕

耨亦以逸待勞之策詔從之興定二年帝諭樞密院曰
中京商號諸州軍人願耕屯田比已括地授之聞徐宿
軍獨不願受意謂予田必絕其廩給也朕肯爾耶其以
朕意曉之因命諸軍徧授屯田邳州行省侯摯言東平
以東屢經殘燬邳海之間貧民失業者甚衆日食野菜
無所依倚恐因而嘯聚以益敵乞募邊為兵自十月給
糧使充戍役至二月罷之人授地三十畝貸之種粒而
驗其收穫量數取之逮秋復隸兵伍且戰且耕公私交

利亦望被俘之民易於招集也至三年籍邳海等州義軍及脅從歸國而充軍者人給地三十畝有力五十畝仍蠲差稅日支糧二升四年移刺不言軍戶自徙河南數歲尚未給用兼以移徙不常莫得安居故貧者甚衆請括諸屯處官田人給三十畝仍不移屯他所如此則軍戶可以得所官糧可以漸省宰臣奏前此亦有言授地者樞密院謂俟事緩而行之今河南罹水災流亡者衆所種麥不及五萬頃殆減往年大半歲入不能足若

撥授之為永業俟有獲即罷其家糧亦省費之一端也
從之五年京南行三司舒穆魯幹魯言京南東西三路
屯軍老幼四十萬口歲費糧百四十餘萬石皆坐食民
租甚非善計宜括逋戶舊耕田南京一路舊墾田三十
九萬八千五百餘頃內官田民耕者九萬九千頃有奇
今饑民流離者大半東西南路計亦如之朝廷雖招使
復業民恐既復之後生計未定而賦歛隨之往往匿而
不出若分給軍戶人三十畝使之自耕或召人佃種可

數歲之後蓄積漸饒官糧可罷令省臣議之仍不果行

欽定續通典卷五

欽定四庫全書

欽定續通典卷六

食貨

屯田下

元明

元太祖時舒穆魯拜達勒為霸州等路元帥鎮守固安
水寨令軍士屯田且耕且戰披荆棘立廬舍數年之間
城市悉完為燕京外蔽憲宗初以有宗兵世祖請立經
略司於汴以蒙古史天澤等為使授之兵牛敵至則禦

敵去則耕乃置屯田萬戶於鄧完城以備之三年汪特
格修治利州且屯田七月屯田於鳳翔中統二年詔鳳
翔府種田戶隸平陽兵籍毋令出征務耕屯以給軍餉
又詔諸道括逃軍還屯田嚴其禁三年始立左衛屯田
調樞密院二千人於東安州南永清縣東荒土及本衛
元占牧地立屯開耕分置左右手屯田千戶所其官屬詳載職官典武官
下卷中為軍二千名為田一千三百一十頃六十五
畝又置右衛屯田調本衛軍二千人於永清益津等處

立屯開耕分置左右手屯田千戶所其屯軍田畝之數
與左衛同至元元年以益都武衛軍千人屯田燕京官
給牛種二年詔孟州之東黃河之北南至八柳樹枯河
徐州等處凡荒閒地土可令阿珠阿嚙罕等所領士卒
立屯耕種并摘各萬戶所管漢軍屯田又詔西川山東
南京等路戍邊軍屯田四年置中衛屯田於武清香河
等縣繼以各屯地界相去百餘里往來耕作不便遷於
河西務荒莊楊家口青臺楊家白等處其屯軍之數與

左衛同為田一千三十七頃八十二畝六年以攻襄樊
軍餉不足發南京河南歸德諸路編民二萬餘戶於康
鄧申裕等處立屯七年創立高麗屯田是時東征日本
欲積糧餉為進取之計遂以王導洪茶邱等所管高麗
戶二千人及發中衛軍二千人合婆娑府咸平府軍各
一千人於王京東寧府鳳州等處一十處置立屯田設經
略司以領其事每屯用軍五百人八年僉發己未年隨
州鄂州投降人民一千一百七十戶往中興居住繼即

編為屯田戶凡二千四百丁

至二十三年續僉
漸丁得三百人

為田一

千八百頃十一年徙生券軍屯田和林置陝西屯田總
管府以安西王府所管編民二千戶立櫟陽涇陽終南
渭南屯田又置寧夏路放良官屯田從安撫司請以招
良人民九百四戶編聚屯田為田四百四十二頃五十
畝又置敘州宣撫司民屯命西蜀四川經略司起立屯
田又置潼州府民屯僉本府編民及義士軍二千二百
二十四戶立屯又置夔路總管府民屯僉本路編民至

五千二十七戶又置重慶路民屯於江津巴縣瀘州忠州等處僉撥編民二千三百八十七戶并召募共三千五百六十五戶十二年置大理金齒等處宣慰司都元帥府軍民屯命於所轄州縣拘刷漏籍人戶得六千六百有六戶立屯田繼又僉本府編民四百戶及永昌府編民一千二百七十五戶增益之後立大理軍屯於爨犂軍內撥二百戶續僉二百八十一戶又增一百一十九戶總計民屯三千七百四十一戶軍屯六百戶為田

軍民已業二萬二千一百五雙又置曲靖等處宣慰兼
管軍萬戶府軍民屯田拘刷所轄州郡諸色漏籍人戶
七百四十戶立曲靖路民屯續僉民一千五百戶增入
其所耕之田官給一千四百八十雙自備已業田三千
雙復立澂江民屯所僉屯戶與曲靖同凡一千二百六
十戶後立軍屯於爨犍軍內僉一百六十九戶復僉一
百二十六戶增入又立仁德府民屯所僉屯戶與澂江
同凡八十戶給田一百六十雙後立軍屯僉爨犍軍四

十四戶續僉五十六戶增入所耕田畝四百雙俱係軍
人已業置順慶路民屯僉順慶民三千四百六十八戶
置立屯田又置成都路民屯僉陰陽人四十戶辦納屯
種又置鶴慶等路軍民屯田僉鶴慶路編民一百戶立
民屯後又僉熨熨軍一百五十二戶立軍屯軍屯六百
八雙民屯四百雙俱已業又置中慶路軍民屯田於所
屬州縣內拘刷漏籍人戶得四千一百九十七戶官給
田一萬七千二十二雙自備已業田二千六百二雙繼

立軍屯用爨棘軍人七百有九戶官給田二百三十四
雙自備已業田二千六百一雙又置臨安宣慰司兼管
軍萬戶府軍民屯田於所屬州縣拘刷漏籍人戶開耕
宣慰司所管民屯三百戶田六百雙本路所管民屯二
千戶田三千四百雙繼又續立爨棘軍屯為戶二百八
十八田一千一百五十二雙十三年置廣元路民屯從
利路元帥言廣元實東西兩川要衝支給浩繁經理係
官田畝得九頃六十畝遂以褒州刷到無主人人口偶配

為十戶立屯開種十五年置威楚提舉司屯田於威楚
提舉鹽使司拘刷漏籍人戶充民屯本司就領其事為
戶三十三為田一百六十五雙又置威楚路軍民屯田
拘刷本路漏籍人戶得一千一百一戶內八百六十六
戶官給無主荒田四千三百三十雙餘戶自備已業田
一千一百七十五雙繼立屯軍於本路巽轅軍內僉三
百九十九戶內一十餘戶官給荒田六十雙餘戶自備
已業田一千五百三十六雙又置前衛屯田以各省軍

人備侍衛者於霸州保定涿州荒閑地土屯種分置左右手屯田千戶所屯軍與左衛同為田一千頃又置後衛屯田以永清等處田畝低下遷昌平縣之太平莊屯軍與左衛同為田一千四百二十八頃十六年給千戶瑪尼部下巴圖軍及土渾川軍屯田牛具置淮東淮西屯田打捕總管府募民開耕連海州荒地官給禾種自備牛具所得子粒官得十之四民得十之六仍免屯戶徭役為戶一萬一千七百四十三為田一萬五千一百

五十三頃三十九畝又置寶坻屯僉大都屬邑編民三百戶立屯於大都之寶坻縣為田四百五十頃又置額齊納屯田調歸附軍人於甘州至十八年置武衛屯田發迤南軍人三千名於涿州保定定興等處置立屯田分設廣備萬益等六屯為田一千八百四頃四十五畝以充屯田軍後又遷甘州新附軍二百人往屯額齊納合即渠開種為田九十一頃五十畝又置虎賁親軍都指揮使司屯田因阿爾婁官人言近於瑪納齊圖沁納

沁高州呼蘭達巴等處改置驛傳臣等議可於舊置驛
所設立屯田從之後發虎賁親軍二千人入屯又增軍
一千凡立三十四屯於上都置司為軍三千人佃戶七
十九為田四千二百二頃七十九畝是時又置德安等
處軍民屯田總管府以各翼取到漢軍及各路拘收手
號新附軍分置十屯立屯田萬戶府繼又改立總管府
為民九千三百七十五名軍五千九百六十五名為田
八千八百七十九頃九十六畝又置甘肅管軍萬戶府

屯田發軍於甘州黑山子滿峪泉水渠鴨子翅等處立
屯田為戶二千二百九十為田一千一百六十六頃六
十四畝又置汀漳屯田以福建調軍糧儲用依腹裏例
置立屯田命管軍總管鄭楚等發鎮守士卒年老不堪
備征戰者得百有十四人又募南安等縣居民一千八
百二十五户立屯耕作十九年置陝西等處萬户府屯
田以盤屋南係官荒地發歸附軍立孝子林張馬村軍
屯繼以南山把口子巡哨軍人八百户於盤屋之杏園

莊寧州之大昌原屯田又發文州鎮戍新附軍九百人
立亞栢鎮軍屯復以燕京戍守新附軍四百六十三戶
於德順州之威戎立屯開耕為戶孝子林屯三百一戶
張馬村屯三百一十三戶杏園莊屯二百三十三戶大
昌原屯四百七十四戶亞栢鎮屯九百戶威戎屯四百
六十三戶為田孝子林二十三頃八十畝張馬村七十
三頃八十畝杏園莊一百一十八頃三十畝大昌原一百
五十八頃七十九畝亞栢鎮二百六十八頃五十九畝

威戎一百六十四頃八十畝又置桂齊延安府屯以拘
收贖身放良布呼齊及漏籍戶計於延安路特默齊草
地屯田為戶二千二十七為田四百八十六頃又置寧
夏等處新附軍萬戶府屯田發迤南新附軍一千三百
八十二戶往寧夏等處屯田又遣塔塔喇千戶所管軍
人九百五十八戶屯田為田一千四百九十八頃三十
三畝又置紹慶路民屯於本路未當差民戶內僉二十
三名置立屯田繼於彭水縣籍管萬州寄戶內僉撥二

十戶又僉彭水縣未當差民戶三十二戶增入後以屯
戶貧乏者多負逋復僉彭水縣編民一十六戶補之又
置嘉定路民屯僉亡宋編民四戶置立屯田繼又撥成
都義士軍八戶增入二十一年置嶺北行省屯田併和
林阿拉克岱元領軍一千人入五條河後又摘六衛漢
軍一千名赴青海屯田以五條河漢軍併入青海後又
屢增軍戶共為戶四千六百四十八為田六千四百餘
頃又置金復州萬戶府屯田發新附軍一千二百八十一

戶於根敦扎卜置立屯田繼又分京師應役新附軍一
千人屯田哈斯罕關東荒地後又以伊魯音特穆爾塔
斯哈雅兩萬戶新附軍一千三百六十戶併入金復州
立屯耕作為戶三千六百四十一為田二千五百二十
三頃又置芍陂屯田萬戶府因江淮行省言安豐之芍
陂可溉田萬餘頃乞置三萬人立屯中書省議發軍士
二千人行之屯戶共一萬四千八百八名又置夔府萬
戶府軍屯從四川行省議除沿邊重地分軍鎮守餘軍

一萬人命官於諸處擇膏腴地立屯開耕為戶三百五十一人為田五十六頃七十畝凡創立十四屯其成都等路萬戶府軍屯於本路崇慶州義興鄉楠木園置立為戶二百八十九人為田四十二頃七十畝河東陝西等路萬戶府軍屯置立於灌州之青城陶壩及崇慶州之大柵頭等處為戶一千一百二十八名為田二百八十八頃七畝廣安等處軍屯置立於成都路崇慶州之七寶壩為戶一百五十名為田二十六頃二十五畝保寧萬

戶府軍屯置立於崇慶州之金馬為戶一百六十四名
為田七十五頃九十五畝敘州萬戶府軍屯置立於灌
州之青城為戶二百二十一名為田三十八頃六十七
畝五路萬戶府軍屯置立於成都之大柵鎮孝感鄉及
灌州青城縣之懷仁鄉為戶一千一百六十一名為田
二百三頃一十七畝興元金州等處萬戶府軍屯置立
於崇慶州晉源縣之孝感鄉為戶三百四十四名為田
五十六頃隨路八都萬戶府軍民屯置立於灌州青城

溫江縣為戶八百三十二名為田一百六十二頃五十
七畝舊附等軍萬戶府軍屯置立於灌州青城縣崇慶
州等處為戶一千二名為田一百二十九頃五十畝砲
手萬戶軍屯置立於灌州青城縣龍池鄉為戶九十六
名為田一十六頃八十畝順慶軍屯置立於晉源縣義
興鄉江源縣將軍橋為戶五百六十五名為田九十八
頃十七畝平陽軍屯置立於灌州青城崇慶州大柵頭
為戶三百九十八名為田六十九頃六十五畝遂寧州

軍屯為戶二千名為田三百五十頃又置嘉定府萬戶
軍屯摘蒙古漢軍及嘉定新附軍三百六十人於崇慶
州青城等處屯田為田二頃二十畝二十二年置廣濟
署屯田以崔黃口空城屯田歲澇不收遷於青滄等處
以尚珍署舊領屯夫二百三十戶歸之既又遷濟南河
南五百五十戶平灤真定保定三路屯夫四百五十戶
併入共為戶一千二百三為田一萬二千六百頃三十
八畝又置豐潤署屯田於大都路薊州之豐潤縣為戶

八百三十七為田三百四十九頃二十三年置尚珍署
屯田於濟寧路之兗州為戶四百五十六為田九千七
百一十九頃七十二畝又置洪澤萬戶府屯田初於洪
澤南北三屯設萬戶府以統之因江淮行省言國家經
費錢糧為急今屯田之利無過兩淮况芍陂洪澤皆漢
唐舊立屯之地若令江淮新附漢軍屯田可歲得糧百
五十餘萬石從之繼罷三屯萬戶止立洪澤屯田萬戶
府以統之其置立處所在淮安路之白水塘黃家疇等

處為戶一萬五千九百九十四名為田三萬五千三百一十二頃二十一畝二十四年置左右欽察衛屯田發本衛軍一千五百一十二名分置左右手屯田千戶所及欽察屯田千戶所於清州等處屯田後又創立龍翊侍衛復隸焉為軍左手千戶所七百五名右手千戶所四百三十七名欽察千戶所八百名為田左手千戶所一百三十七頃五十畝右手千戶所二百一十八頃五十畝欽察千戶所三百頃又置永平屯田總管府以北

京採取材木百姓三千餘戶於灤州立屯設官署以領其事為戶三千二百九十為田一萬一千六百一十四頃四十九畝又置管田提舉司設立於大都灤州之武清縣為戶軍二百五十三民一千二百三十五析居放良四百八十布疋齊二百三十二和卓一百三十口獨居布疋齊一十二口哈喇穆爾丹八十二名為田三千五百二頃九十三畝二十五年置湖南宣慰司衡州等處屯田調德安萬戶府軍士一千四百六十七名分置

衡州之清化永州之烏符武岡之白倉置立屯田二十
六年置左翼屯田萬戶府罷蒙古軍人之屯田者別以
鄂端巴實伯里回還漢軍及大名衛輝兩翼新附軍與
前後二衛迤東還戍士卒合併屯田設左右翼屯田萬
戶府以領之遂於大都路霸州及河間等處立屯開耕
置漢軍左右手二千戶新附軍六千戶所為軍二千五
十一名為田一千三百九十九頃五十二畝其右翼屯
田萬戶府繼發真定軍人三百名於武清縣崔黃口增

置屯田分置漢軍千戶所三別置新附軍千戶所為軍
一千五百四十人為田六百九十九頃五十畝又置保
寧萬戶府軍屯因保寧府言本管軍人一戶或二丁三
丁父兄子弟應役實為重併若又遷於成都屯種去家
隔遠逃匿必多乞令本府在營士卒及夔路守鎮軍人
止於保寧沿江屯種從之僉軍一千二百名繼發屯軍
一百二十九人從萬戶伊蘇岱爾西征別僉漸丁軍人
入屯為戶一千三百二十九名為田一百一十八頃二

十七畝又置順慶等處萬戶府軍屯發軍於沿江下流
漢初等處屯種為戶六百五十六名為田一百一十四
頃八十畝二十七年置武定路總管府軍屯以雲南戍
軍糧餉不足於和曲祿勸二州變棘軍內僉一百八十
七戶立屯耕種為田七百四十八隻又置烏撒宣慰司
軍民屯田其烏撒路軍屯以變棘軍一百一十四戶屯
田又立東川路民屯屯戶亦係變棘軍人八十六戶皆
自備已業又置羅羅斯宣慰司兼管軍萬戶府軍民屯

田其會通民屯戶係黻黷土軍建昌民屯撥編民一百四戶又立會川民屯發本路所轄州邑編民四十戶德昌路民屯發編民二十一户二十九年置忠翊侍衛屯田命各萬戶府摘大同隆興太原平陽等處軍人四千名楊珠格爾齊勤地面及紅城周迴置立屯田開耕荒田二千頃仍命西京宣慰司領其事後改立大同等處屯儲萬戶府以領之又改為侍衛親軍都指揮使司仍領屯田三十年置梁千戶翼軍屯因梁王遣使詣雲

南行省言以漢軍一千人置立屯田後發三百人備鎮
戍巡邏止存七百人於烏蒙屯田後遷於新興州為田
三千七百八十九雙又置海北海南道宣慰司都元帥
府民屯召募民戶并發新附士卒於海南海北等處置
立屯田繼以其地多瘴癘縱屯軍二千人還各翼留二
千與召募之民屯種後罷屯田萬戶府屯軍悉令還役
止令民戶八千四百二十八戶屯田瓊州路五千五百
一戶雷州路一千五百六十六戶高州路九百四十八

戶化州路八百四十三戶廉州路六十戶為田瓊州路
二百九十二頃雷州路一百六十五頃五十一畝高州
路四十五頃化州路五十五頃二十四畝廉州路四頃
八十八畝成宗元貞元年置肇州蒙古屯田萬戶府以
納延布拉噶齊及打魚碩達勒達女真等戶於肇州旁
近地開耕為戶布拉噶齊二百二十戶碩達勒達八十
戶歸附軍三百戶續增漸丁五十二戶二年置敘州等
處萬戶府軍屯遷遂寧屯軍二百三十九於敘州宣化

縣喁口上下荒地開墾為田四十頃八十三畝大德二年置廣西兩江宣慰都元帥府獐兵屯田部民呂瑛言募牧蘭等處及融慶溪洞獐獐民丁於上浪等處開屯耕種繼又平大任洞以所遺地產續置藤州屯田為戶上浪屯一千二百八十二戶忠州屯六百一十四戶那扶屯一千九戶雷留屯一百八十七戶水口屯一千五百五十九戶又置贛州路南安寨兵萬戶府屯田以贛州路所轄信豐會昌龍南安遠等處賊人出沒發寨兵

及宋舊役弓手與抄數漏籍人戶立屯耕守以鎮遏之
為戶三千二百六十五為田五百二十四頃六十八畝
四年置大同等處屯儲總管府屯田以西京黃華嶺等
處田土頗廣發軍民九千餘人立屯開耕為戶軍四千
二十民五千九百四十五為田五千頃武宗至大元年
置左衛率府屯田於大都路灤州武清縣及保定路新
城縣置立屯田仁宗延祐二年置烏蒙等處屯田總管
府軍屯因雲南行省言烏蒙乃雲南咽喉之地別無屯

戍軍其地皆古屯田之跡乞發輝和爾及新附軍屯田鎮遏從之七年置重慶五路守鎮萬戶府軍屯發軍一千二百人於重慶路三堆中曹趙市等處屯耕為田四百二十頃英宗至治二年置宗仁衛屯田發五衛漢軍二千人於大寧等處創立屯田分置兩翼屯田千戶所為田二千頃文宗至順元年置宣忠衛屯田命收聚訖一萬俄羅斯給地一百頃立宣忠扈衛親軍萬戶府屯田

明太祖初立民兵萬戶府寓兵於農其法最善又令諸將屯兵龍江等處惟都水營田司康茂材績最著乃下令褒之因以申飭將士曰興國之本在於強民足食自兵興以來民無寧居連年饑饉田地荒蕪若兵食盡資於民則民力重困故令將士屯田且耕且戰今各將帥已有分定地鎮然隨處地利未能盡墾數年未見功緒唯康茂材所屯得穀一萬五千餘石以給軍餉尚餘七千石以此較彼地力均而入有多寡蓋人力有勤惰故

耳自今諸將宜督軍士及時開墾以收地利繼於兩京
各省直建設衛所置屯田以都司統攝之洪武三年中
書省請稅太原朔州等衛屯田官給牛種者十稅五自
備者稅其四帝命弗徵明年中書省言河南山東北平
陝西山西及直隸淮安諸府屯田凡官給牛種者十稅
五自備者十稅三詔且弗徵三年後畝收租一斗是年
募鹽商於各邊開中謂之商屯因大同糧儲自陵縣運
至太和嶺路遠費重從山西行省言令商人於大同倉

入米一石太原倉入米一石三斗者給淮鹽一小引以
省途費而充邊儲謂之開中繼各行省邊境多召商中
鹽輸米諸倉以為軍儲計道里遠近自五石至一石有
差先後增減則例不一率視時緩急米石高下中納者
利否道遠地險則減而輕後至弘治中戶部尚書葉淇變法而開中始壞諸淮商恣
撤業歸西北商亦多徙家於淮邊地為虛米石值銀五
兩邊儲枵然至嘉靖時陝西巡撫楊一清復請召商開
中龐尚鵬總理江北鹽屯尋於九邊與總督
王崇古區畫屯政然因循日久卒鮮實效

四年從中

書右丞相徐達請徙山後民一萬七千餘戶屯北平又

令於山北口外東勝蔚州安豐雲應等州極邊沙漠之地各設千百戶收撫邊民無事則耕有事則戰就以所儲草給之達又以沙漠遺民三萬二千餘戶屯田北平凡置屯二百五十四開田一千三百四十三頃六年太僕丞梁額森特穆爾言寧夏境內及四川西南至船城東北至塔灘相去八百餘里土田膏沃宜招集流民屯田從之是時遣鄧愈湯和諸將屯陝西彰德汝寧北平徙山西真定民屯鳳陽又因海運餉遼有溺死者遂益

講屯政天下衛所州縣軍民皆事墾開其移民就寬鄉
或召募或罪徙者為民屯皆領之有司軍屯則領之衛
所邊地三分守城七分屯種內地二分守城八分屯種
每軍受田五十畝為一分給耕牛農具教樹植復租賦
遣官勸輸誅侵暴之吏初稅畝一斗後定科則軍田一
分正糧十二石貯屯倉聽本軍自支餘糧為本衛所官
軍俸糧十九年以雲南既平諸蠻未附命西平侯沐英
鎮之英奏雲南土地甚廣而荒蕪居多宜置屯田命軍

士開耕以備儲蓄乃諭戶部曰屯田可以紓民力立兵食邊方之計莫善於此然邊地久荒榛莽蔽翳用力實難宜緩其歲輸使樂耕作數年之後徵之可也英奉詔自永寧至大理六十里設一堡留軍屯田後景川侯曹震乂屯田品甸普定侯陳桓靖寧侯葉昇屯田定邊姚安畢節諸衛二十一年敕五軍都督府曰養兵而不病於農者莫若屯田今海宇寧謐邊境無虞若使兵坐食於農農必受敝非長治久安之術其令天下衛所督兵

屯種庶幾兵農兼務國用以舒自是歲得糧五百餘萬
石二十三年延安侯唐勝宗督貴州屯田二十四年又
諭後軍都督沐春曰今塞外清寧已置大寧都司及廣
寧諸衛足以守邊而守關軍士已令撤之而山海關猶
循故事其七站軍士雖名守關實廢屯田養馬自今一
片石等關每處止存軍士十餘人譏察逋逃餘悉令屯
田二十五年詔天下衛所軍以十之七屯田宋國公馮
勝顏國公傅友德帥開國公常昇等分行山西籍民為

軍屯田於大同東勝立十六衛建文四年令直隸屯田
差御史比較各都司屯田巡按御史比較後改增按察
使僉事盤查屯田或令各省布按三司提督或令巡按
御史提督或令總兵官鎮守提督或差戶部郎中巡屯
御史隨時更改沿革不一成祖永樂元年命靖安侯王
忠往北京整理屯田工部尚書黃福奏陝西所屬行都
司所屬屯田多缺耕牛耕具合准北京例官市牛給之
耕具於陝西布政司所屬鑄造從之二年定屯田官軍

賞罰例歲食米十二石外餘六石為率多者賞鈔缺者
罰俸又以田肥瘠不同法宜有別命軍官各種樣田以
其歲收之數相考較太原左衛千戶陳淮所種樣田每
軍餘糧二十三石帝命重賞之寧夏總兵官何福積穀
尤多賜勅褒美戶部尚書郁新言湖廣諸衛收糧不一
種請以米為準凡粟穀糜黍大麥蕎麥二石稻菰秫二
石五斗稭稗三石皆準米一石小麥麻豆與米等從之
著為令又更定屯守之數臨邊險要守多於屯地僻處

及輸糧艱難者屯多於守屯兵百名委百戶三百名委千戶五百名以上指揮提督之屯設紅牌列則例於上年六十與殘疾及幼者耕以自食不限於例屯軍以公事妨農務者免徵子粒並禁衛所差撥宣宗宣德中屢覈各屯以征戍罷耕及官豪勢要占匿者減餘糧之半迤北來歸就屯之人給車牛農器分遼東各衛屯軍為三等丁牛兼者為上丁牛有一為中俱無為下兵科給事中戴弁言自山海關至薊州守關軍萬人列營二十

三所操練之外無他差遣若稍屯種亦可實邊請取勘
營所附近荒田斟酌分給且屯且守帝命戶部兵部各
遣官與都督陳景先經理兵部黃福言永樂間雖營建
北京南討交趾北征沙漠資用未嘗乏比國無大費而
歲用僅給即不幸有水旱征調將何以濟請設操備營
繕軍士十萬人於濟寧以北衛輝真定以東緣河屯種
初年自食次年入收五石三年收倍之既省京食口糧
六十萬石又省本衛月糧一百二十萬石歲可得二百

八十萬石帝善之下戶兵二部議部奏緣河屯田實便
請先以五萬頃為率發附近居民五萬墾之但山東近
年旱饑流徙初復衛卒多力役宜先遣官行視田以俟
開墾遂令吏部郎中趙新等經理福總其事既而有言
軍民各有常業若復分田役益勞擾事竟不行繼遣侍
郎羅汝敬督陝西屯田柴車經理山西屯田分遣御史
巡視寧夏甘州屯田水利至七年帝從戶部議令他衛
軍戍宣府者悉遣還屯種左都督譚廣上言臣所守邊

一千四百餘里敵人窺伺竊發無時脫有警徵兵數百里外勢豈能及屯種之議臣愚未見其可帝以邊卒戍守有餘但命永樂中調戍者勿遣英宗正統元年發禁軍三萬人屯田畿輔二年免軍田正糧歸倉止徵餘糧六石後又免沿邊開田官軍子粒減各邊屯田子粒有差景帝景泰初邊方多事令兵分為兩番六日操守六日耕種時學士商輅言邊外田地極廣先因在京功臣等將附近各城堡膏腴之產占作莊田其餘閒田又為

鎮守總兵叅將等占為己業以致軍士無田可耕夫且耕且守如漢趙充國諸葛亮晉羊祜皆有明效今日守邊之要莫要於此下所司議行憲宗成化初宣府巡撫葉盛買官牛千八百并置農具遣軍屯糧收糧易銀以補官馬耗損邇人稱便自正統後屯政稍弛而屯糧總存三之二其後屯田多為內監軍官占奪法盡壞憲宗之世頗議墜復而視舊所入不能什一矣孝宗弘治間屯糧愈輕有畝止三升者而定制各省屯糧又折以銀

雖有徵糧違限之罰強占屯田之禁終無大裨十四年
戶部尚書秦紘總制三邊見固原迤北延袤千里間田
數十萬頃曠野近邊無城堡可依議於花馬池迤西至
小鹽池二百里每二十里築一堡堡周四十八丈役軍
五百人固原迤北諸處亦各築屯堡募人屯種每頃歲
賦米五石可得五十萬石下詔行之武宗正德時遼東
屯田較永樂間田贏萬八千餘頃而糧乃縮四萬餘石
初永樂時屯田米常溢三之一常操軍十九萬以屯軍

四萬供之而受供者又得自耕邊外軍無月糧以是邊
餉恒足及是屯軍多逃死常操軍止八萬皆仰給於倉
而邊外數擾棄不耕劉瑾擅政遣官分出丈田責逋希
瑾意者偽增田數披括慘毒至遼卒脇衆為亂撫之乃
定世宗嘉靖時遼東巡撫李承勛招逋逃三千二百人
開屯田千五百頃僉都御史劉天和督甘肅屯政請以
肅州丁壯及山陝流民於近邊耕牧且推行於諸邊奏
當興革者十事田利大興總督宣大魚督河南山東軍

務翟鵬浚濠築垣修邊牆三百九十餘里得地一萬四千九百餘頃募軍千五百人人給五十畝省倉儲無糗大同巡撫詹榮以近邊弘賜諸堡三十一所延亘五百餘里闢治之皆膏腴田可數十萬頃乃奏請召軍佃作復租徭移大同一歲市馬費市牛賦之秋冬則聚而遏寇帝從之時楊一清復請召商開中又請倣古募民實塞下之意招徠隴右闕西民以實邊其後周澤王崇古林富陳世輔王畿王朝用唐順之吳桂芳等爭言屯政

龐尚鵬總理江北鹽屯尋移九邊與總督王崇古先後
區畫屯政甚詳然卒鮮實效給事中管懷理言屯田不
興其弊有四疆場戒嚴一也牛種不給二也丁壯亡徙
三也田在敵外四也如是而管屯者猶欲按籍增賦非
扣月糧即按丁賠補耳屯糧之輕至弘正而極嘉靖中
漸增穆宗隆慶中復畝收一斗然屯丁逃亡者益多管
糧郎中不問屯田有無月糧止半給沿邊屯地或變為
斥鹵沙磧糧額不得減屯田御史又於額外增本折屯

軍益不堪命時給事中鄭大經言薊屯當量地利而定其則遼屯當改營田而足其額此興復屯政之大較也御史李叔和言遼東屯田半廢近行營田之法撥軍耕種致行伍空虛且歲收田租止備修邊工費而各軍支餉如故有損無益蓋此法止可行於河西人少之處若河東則常廣召種之今授田徵稅悉抵歲餉以省內輸簡回壯勇以實行伍仍特勅官董之如內地屯田之制從之時又給宣大屯田官養廉田宣大開墾田已成業

令每十頃內給將官五十畝為養廉之資若副叅開種
不及百頃守備以下或不及一十頃叅論戒飭又詔各
邊自墾田永不起科如歲增粟十萬五萬石自墾至百
頃千頃者重加陞賞神宗萬厯時山東巡撫鄭汝璧請
開登州海州北長山諸島田福建巡撫許孚遠墾閩海
檀山田成復請開南日山澎湖又言浙江海濱諸山若
陳錢金塘補陀玉環南麂皆可經理天津巡撫汪應蛟
則請於天津興屯或留中不下或不久輒廢時方征倭

寇濟陽衛舍餘李大用等請以萬人自備資糧隨行給事中郝敬上疏曰臣閱李大用等奏畿輔附近濟陽等衛屯牧額兵共四十八萬願以萬人隨行征倭衆軍自貼糧餉臣訪其故自永樂時靖難功成剽精兵四十八萬內一十二萬選入十二團營餘三十六萬給賜屯田牧地種紬子粒馬價分置七十八衛於順天所屬州縣俱屬三千營統轄聽調征勦今二百餘年生齒繁衍與民混雜有司派以馬戶撐船運米等役衆軍脫卸無計

昨者寧夏之役各餘丁議自備糧隨行征勦求免前差未幾寧夏平議遂寢茲緣倭奴告警重復申奏蓋彼以三十六萬之衆止出萬人是三十六十中抽一人耳以三十六萬衆共餉萬人是三十六家共贍一軍耳又得概免民差圖此便利今東征師可勿復用此惟是遼左空虚宜因羣情為轉移之計即於各衛原籍中十名抽一據三十六萬原數除六萬作耗外可得壯丁三萬人擇廉幹官數員統領赴遼東開種屯田於存留三十萬

中各十名幫貼屯田一名牛種廬舍之費令概免前差
開墾田成即給本兵為永業大率每兵一名墾田二十
五畝內除五畝為官田每畝量收子粒五六升則三萬
人可墾田七十五萬畝一歲收官田子粒可八千餘石
以備緩急之需因願赴之人心蠲不急之徭役一呼而
得勝兵三萬坐收兵食兩利之效備門庭之警扶肘腋
之危何憚而久不為此熹宗天啟初巡按張慎言復議
天津屯田而御史左光斗命管河通判盧觀象大興水

田之利太常少卿董應舉踵而行之光斗更於河間天津設屯學試騎射為武生給田百畝保定巡撫汪應蛟亦請興天津屯田疏言天津葛沽一帶地從來斥鹵不耕種臣謂地無水則鹹得水則潤以閩浙治地之法行之未必不可為稻田今春買牛制器開渠築堤葛沽白塘二處耕種五千餘畝內水稻畝收四五石種蜀苴者得水灌溉亦畝收一二石惟旱稻以鰾立槁始信閩浙之法可行於北海而斥鹵可變為膏腴也天津為神京

牖戶開府設鎮其地益重見在水陸兩營兵四千人歲費餉六萬四千餘兩俱加派民間天津荒田奚啻六七千頃若盡依今法為之開渠以通蓄洩築隄以防水澇每千頃各致穀三十萬石以七千頃計之可得穀二百餘萬石非獨天津之餉取給而省司農之轉饋無不可者且地在三岔河外海潮上溢取以灌溉於河無妨白塘以下地無糧差白塘以上為靜海縣或五畝十畝而折一畝糧差每畝不過一分八釐民願賣則給價不願

則給種於民情無拂請以防海官軍用之於海濱墾地
每歲開渠築隄可成田數百頃一面召募居民承種數
年之後荒田漸闢各軍兵且屯且守民間可省養兵之
費重地永資保障之安矣得旨先行李繼貞巡撫天津
亦力於屯務然仍歲旱蝗往往弗克底成效也五年貴
州巡按傅宗龍討諸叛苗大破平越毀其砦百七十宗
龍乃條上屯守策一曰清衛所原田一曰割逆賊故壤
而以衛所之法行之蓋黔不患無田患無人客兵聚散

不常不能久駐莫若倣祖制盡舉屯田以授有功因功
大小為官高下自指揮至總小旗畀以應得田為世業
禁其私買賣不待招徠戶口是實臣所謂以守為屯者
如此部議從之莊烈帝崇禎九年總督宣大山西軍務
盧象昇大興屯政積粟二十餘萬諭九邊皆式之十年
陝西巡撫孫傳庭釐正西安三衛屯糧疏言洪武時每
軍額地一頃歲徵正糧十二石餘糧十二石盡行收貯
屯倉以正糧按月支給本軍以餘糧支給官軍糧俸餉

不煩轉輸而倉廩充實兵不煩召募而士卒精強法至善也至永樂二十年奉詔減免餘糧六石然正餘一十八石猶然交倉按支法尚未壞也至正統二年以正糧十二石充給本軍充餉免納免交止徵餘米六石入倉而此法大壞矣至後復將餘糧六石改為正糧一併充軍免納而此糧既不入倉此地幾為私產莫可究詰矣陝西省下舊四衛因檄行西安府推官王鼎鎮清查除右護衛名隸秦府外先將左前後三衛各地查明推情

定法按地起課即責辦於見今承種之人每上地一頃
徵糧十八石中地量免三石下地又免三石每石折銀
七錢總計三衛起課地三千二十七頃零徵銀三萬五
千餘兩寬平易從無不翕然相安不呼籲以窘大農不
加派以厲刁遺疏上帝褒嘉之



欽定續通典卷六